



Ministerie van Onderwijs, Cultuur en  
Wetenschap

# Studia na Hulanda Oropéo

Informashon pa alumno ku ta bai hasi  
eksámen final i pa studiante ku residensia  
na Hulanda Karibense

Pa wak e informashon  
i animashon online  
skên e QR-code





# Eskoho di estudio

**Den e foyeto aki tin informashon ku por yuda bo kuminsá bo estudio nobo bon prepará. E ta kontené loke bo mester hasi pa eskoho di bo estudio, registrashon, i asuntunan di sèn. Hopi éksito!**

## Orientá bo bon

Bo ta bai studia na un skol superior òf un universidat? Bo ke un associate degree òf un bachelor? Òf bo ta skohe pa un kombinashon di traha i studia? Orientá bo bon i diskutí bo eskoho di estudio ku bo dosentenan, konsehero di estudio (dekano), mèntòr, coach di karera di estudio, amigunan, mayor(nan) òf kuidadó(nan). Bishitá dianan habrí (si esei ta posibel), partisipá den un dia di prueba di estudio i partikularmente, hasi hopi pregunta, por ehèmpel na studiantenan ku ya tin eksperensia ku studia na Hulanda Oropeo. Wak tambe riba wèpsait di skol superior i universidat. Tin biaha nan ta ofresé aktividatnan online tambe.

Riba [studiekeuze123.nl](http://studiekeuze123.nl) bo por kompará estudionan ku otro i bo por haña tep i hèrmènt pràktiko pa yuda bo skohe un estudio. Tambe e ta kontené informashon tokante kontenido di estudionan, dianan habrí (online), satisfakshon di studiante i kiko bo por hasi riba merkado laboral ku un estudio.

Mas informashon tokante e diferensianan entre un associate degree, un bachelor i un master bo por haña riba [studiekeuze123.nl/ad-bachelor-of-master](http://studiekeuze123.nl/ad-bachelor-of-master).

Riba [studiekeuze123.nl/ouders](http://studiekeuze123.nl/ouders) tambe tin tep pa bo mayor(nan) òf kuidadó(nan), pa asina nan por yuda bo.

Tambe tin un página apart pa esnan for di e parti Karibense di e Reino ku ta aspirá di bira studiante: [www.studiekeuze123.nl/studia-na-hulanda](http://www.studiekeuze123.nl/studia-na-hulanda).

## Chèk e eksigensianan pa atmishon

Pa algun estudio bo mester tin un sierto profil òf sierto materia. Eseinan e ora ei ta riba e wèpsait di e universidat òf e skol superior. Pa e fluho di studiante for di mbo, hopi biaha tambe tin otro eksigensianan na vigor ku pa e fluho di studiante for di enseñansa sekundario. Pa e estudio hbo pa dosente den enseñansa básiko (pabo) tin èkstra eksigensia nashonal na vigor. Mas informashon tokante kon bo por prepará bo bon pa esei i ki apoyo ta posibel, bo por lesa riba [goedvoorbereidnaardepabo.nl](http://goedvoorbereidnaardepabo.nl).



**Bo ke sa kiko bo tin derecho riba dje i kiko bo mester regla ora bo ta bai studia? Wak riba [rijksoverheid.nl/studeren](http://rijksoverheid.nl/studeren) pa un bista general personal.**

## Wak si tin eksigensia pa selekshon

Pa estudio manera medisina, hopi biaha tin solamente un kantidat di lugá limitá (*numerus fixus*). Ora tin demasiado aplikashon, lòt òf un otro forma di selekshon lo tuma lugá. Otro estudionan ta selektá a base di eksigensia pa profeshon òf pasobra bo mester tin sierto abilidadat pa esaki, manera e estudionan di arte.

E eksigensianan di selekshon di mas aktual ta riba e wèpsait di e estudio. Un bista general kompleto ta disponibel riba [studiekeuze123.nl/opleidingen](https://studiekeuze123.nl/opleidingen). Riba [studiekeuze123.nl/selectie](https://studiekeuze123.nl/selectie) tambe tin informashon general tokante selekshon.

### *E parti Karibense di e Reino*

Ora ta trata di selekshon, skol superior i universidat hulandes mester tene kuenta ku e situashon di studiante aspirante for di e parti Karibense di Reino, por ehèmpel dor di ofresé e posibilidat pa partisipá na e proseduranan di selekshon riba distansia. Tuma kontakto tokante esaki ku e instituto en kuestion.



## Registrá

### Registrá na tempu

Bo a skohe bo estudio? Registrá mas pronto posibel via [studielink.nl](https://studielink.nl).

Pa registrá via Studielink bo tin mester di un DigiD, un prueba di identidat digital. Na Hulanda Oropeo tur hende por regla esei via [www.digid.nl](https://www.digid.nl). Tanten ku bo no ta biba na Hulanda Oropeo òf no a biba ei, bo no tin un burgerservicenummer (BSN, number pa servisio na siudadano); p'esei, ainda bo no por pidi un DigiD.

Si bo no tin un BSN i DigiD, riba [www.studielink.nl](https://www.studielink.nl) bo ta skohe e opshon 'Studielinkaccount aanmaken zonder DigiD' (Krea kuenta pa link di estudio sin DigiD). Bo por añañá bo formashon preparatorio di forma manual dor di indiká si bo a optené bo diploma kaba òf ta bai opten'é i na ki pais. Por haña Saba, Sint Eustatius i Boneiru tambe apart den e lista di pais.

Pa estudionan ku selekshon (*numerus fixus*), bo mester a registrá pa mas tardá **15 di yanüari 2024 (promé ku 7 or di anochi ora lokal Karibense)**.

E fechanan final pa e sobrá estudionan ku selekshon (manera estudionan di arte) ta riba e wèpsait di e skol superior òf universidat.

Paga bon tinu: e fecha final pa e estudionan aki por ta for di **15 di yanüari 2024** kaba.

Pa e sobrá estudionan, ta mihó pa bo mèldu pa mas tardá riba **promé di mei 2024 (promé ku 6 or di atardi ora lokal Karibense)**.

Pa mas informashon, wak riba [studiekeuze123/aanmelden-voor-1-mei](https://studiekeuze123.nl/aanmelden-voor-1-mei).

## Hasi un tèst di selekshon di estudio

Bo a registrá na tempu via Studielink? E ora ei bo tin derecho riba un tèst di selekshon di estudio, pa wak si e estudio ta algu pa bo. E tèst di selekshon di estudio ta obligatorio pa sierto estudio.

Generalmente, e tèst di selekshon di estudio ta un kòmbersashon, un lès di prueba ku un tèst, òf un lista di pregunta. Despues bo ta haña feedback i un konseho. E konseho ta sin kompromiso ora bo a registrá pa mas tardá riba promé di mei. Pues bo por kambia di estudio ainda, basta bo promé aplikashon tabata pa mas tardá riba promé di mei. Si bo ta biba na Hulanda Karibense, e instituto pa formashon tin e deber di ofresé bo e posibilidat pa hasi e kòmbersashon aki riba distansia di forma digital si bo ta deseá esei. Tuma kontakto ku e estudio pa esaki.

Bo no ta satisfecho tokante e tèst di selekshon di estudio òf e konseho? Den e kaso ei, bai den kòmbersashon ku e instituto. Òf tuma kontakto ku organisashonnan pa estudiante LSVb i ISO.

Pa sierto estudio, e tèst ta obligatorio. Estudionan ku selekshon no ta ofresé tèst di selekshon di estudio.

Lesar tur kos tokante e tèst di selekshon di estudio riba **studiekeuze123.nl/**  
**studiekeuzecheck**.

## Apoyo èkstra?

Na Hulanda Oropeo, estudiante Karibense por haña nan ku problema na komienso di nan estudio. Tin biaha, esakinan ta bottlenecknan práktiko manera hasi petishon pa un Burgerservicenummer (BSN) òf pa seguro di kuido, tin biaha ta e idioma i kultura. Por ta difísil pa haña bibienda tambe. P'esei, ta ofresé ayudo òf guia serka e paso pa Hulanda Oropeo pa estudiante for di Hulanda Karibense, por ehèmpel dor di gobièrnu i/òf dor di organisashonnan privá manera TuranGoeloe. Tin biaha bo mester paga pa esaki, tin biaha e ta grátis.

Via Rijksdienst Caribisch Nederland (RCN) por ehèmpel bo por hasi un petishon pa un kompensashon pa gastu inisial (opstarttoelage). Ku esaki bo por hasi uso di guia grátis dor di e organisashon TuranGoeloe. Pa mas informashon tokante esaki, tambe wak e paragraf Finansiamentu di Estudio mas leu, i e wèpsait **www.rijksdienstcn.com/opstarttoelage**.

Pa prepará bo bon riba e paso, ta importante pa papia ku amigunan i ku otronan ku a yega di hasi un estudio na Hulanda Oropeo. Nan por kompartí nan eksperensianan ku bo i duna bo tep.

Skolnan superior i universidatnan ta ofresé apoyo den kaso di problema ku bista òf un otro limitashon funshonal, disleksia i problema síkiko, pero tambe pa tarea di kuido òf deporte na nivel haltu.

E institutonan gustosamente lo buska un solushon adekuá huntu ku bo. Pero tuma kontakto tokante bo situashon basta tempu promé ku komienso di bo estudio.

Na **hogeronderwijstoegankelijk.nl** tin mas informashon.

### Registrashon definitivo

Bo a inskribí definitivamente ora e siguiente asuntunan ta na òrdu:

1. Bo a optené bo diploma, òf a finalisá e tèst 21+ ku éksito.
2. Bo a outorisá e skol superior òf universidat pa kita e sèn di lès for di bo kuenta.
3. Bo a kumpli ku posibel otro kondishon.

Lo bo haña informashon tokante esaki via Studielink. Sòru ku bo a regla tur kos **promé ku promé di sèptèmber**.



## Asuntunan di sèn

### Regla finansiamentu di estudio

Hasi petishon pa finansiamentu di estudio **duo.nl**. Den hbo i enseñansa universitario, bo tin derecho riba finansiamentu di estudio tambe ora bo no a kumpli 18 aña ainda. Hasi bo petishon pa finansiamentu di estudio na tempu. Preferiblemente, por lo ménos 8 siman promé ku bo tin derecho riba dje. E ora ei bo ta sigur ku nada no ta bai robes. E finansiamentu di estudio ta konsistí di diferente parti ku bo por pidi apart:

- Beka básiko
- Beka komplementario
- Produkto di biahe pa studiante
- Fiansa ku interes
- Krédito pa sèn di lès (solamente pa hbo i universidat)

Bo ta hasi un estudio riba nivel 1 òf 2? E ora ei bo beka básiko, e produkto di biahe pa studiante i un posibel beka komplementario semper ta un donashon. E fiansa ku interes sí semper bo mester paga bèk, ku interes.

Pa mbo nivel 3 & 4 i enseñansa superior e beka básiko, e beka komplementario i e produkto di biahe pa studiante ta un beka di prestashon. Si bo optené bo diploma denter di 10 aña, lo kombertí nan den un donashon. Si esei no logra, sí bo mester paga tur kos bèk, ku interes. Fiansa ku interes i krédito pa sèn di lès semper mester paga bèk, ku interes.

**Tep: riba duo.nl/meerdanlenen tin un bista general di kiko un estudio ta kosta, kon otro studiante ta bini na sèn, i kuantu finansiamentu di estudio bo por haña.**

### **E beka básiko**

Altura di e beka básiko ta dependé di bo situashon di bibienda. Bo ta bai biba aworó ku (un di) bo mayornan? E ora ei bo ta biba na kas (thuiswonend). Bo no ta biba serka bo mayor(nan)? E ora ei bo ta biba pafó di kas (uitwonend). E beka básiko ta mas haltu ora bo ta biba pafó di kas.

### **Un beka komplementario**

Riba e beka básiko kisas bo por haña un beka komplementario. Semper hasi un petishon pa e beka komplementario! Ta un biaha so mester hasi petishon. Despues, DUO ta kalkulá kada aña si bo ta bini na remarke p'e. Altura di e beka komplementario ta dependé di entrada di bo mayornan. Tambe lo tene kuenta ku e kantidat di yu ku bo mayornan ta kuida, i si bo mayornan ta pagando bèk un debe di estudio.

### **E produkto di biahe pa studiante**

E produkto di biahe pa studiante

Ku e produkto di biahe pa studiante bo ta biaha rònt henter Hulanda grátis òf ku rebaho, ku tur transporte públiko. Bo por skohe entre un abono pa den siman òf pa fin di siman.

### **Fiansa i un krédito pa sèn di lès**

Bo no por lora kompletamente finansieramente? E ora ei bo por sera un fiansa èkstra serka DUO. Bo por adaptá e suma ku bo ta fia tur luna. Tin un interes ta kore riba e fiansa for di e luna despues ku bo haña e fiansa. Durante bo estudio, lo fiha e porsentahe di interes kada aña, i e por ta diferensia di un aña pa otro.

Ora bo fia sèn, bo ta montoná un debe di estudio. Despues di bo estudio, bo mester paga e debe ei bèk ku interes den término mensual repartí den 35 aña. Ora di paga bo debe di estudio bèk, lo tene kuenta ku bo entrada. Den algun kaso, bo mes mester duna informashon tokante e entrada aki. Si bo no tin entrada òf si bo tin tiki entrada, bo ta paga ménos bèk. Tambe bo por pidi un fiansa apart serka DUO pa paga bo sèn di lès, e krédito pa sèn di lès. Esei tambe bo mester paga bèk, ku interes, despues di bo estudio.

### **Hasi petishon sin BSN i DigiD**

Pasobra bo no tin un *burgerservicenummer* (BSN) ainda, bo no por pidi un DigiD i bo mester hasi petishon pa e finansiamentu di estudio via un formulario.

Asina ku bo ta biba na Hulanda Oropeo, bo mester inskribí serka bo munisipio i e ora ei bo ta haña un BSN. Ku e BSN aki bo por pidi un DigiD i bo por regla asuntu relashoná ku finansiamentu di estudio despues online via 'Mijn DUO'. Mas informashon i e formulario bo ta haña na [www.duo.nl/antillen](http://www.duo.nl/antillen).

### **Kompensashon pa gastu inisial via Rijksdienst Caribisch Nederland (RCN)**

Ora bo ta bai studia na Hulanda Oropeo bo tin di haber ku gastu èkstra, manera un pasashi, kompra di un baiskel i di paña kontra friu pa wenter. P'esei bo por risibí un suma pa un biaha so di RCN-Studiefinanciering pa paga e gastunan aki. Esaki yama e kompensashon pa gastu inisial. E ora ei tambe bo por skohe pa haña guia den bo promé aña; ora bo hasi uso di e kompensashon pa gastu inisial, e guia ei ta grátis.

E kompensashon pa gastu inicial ta konsistí di un beka di prestashon i posiblemente un fianza. Mas informashon tokante e kompensashon pa gastu inicial bo por haña riba [www.rijksdienstcn.com/opstarttoelage](http://www.rijksdienstcn.com/opstarttoelage).

### Finansiamentu di estudio den e region Karibense

Bo ta bai hasi un estudio na Hulanda Karibense, Kòrsou, Aruba, Sint Maarten, Merka, Canada òf den e region Karibense? E ora ei bo por haña Finansiamentu di Estudio BES via RCN-Studiefinanciering i pues no serka DUO. Finansiamentu di Estudio BES ta konsistí di un beka di prestashon i posiblemente un fianza.

Si bo optené bo diploma serka e universidat òf skol superior denter di 10 aña, bo no mester paga e beka di prestashon bèk. E parti di fianza semper bo mester paga bèk. Mas informashon tokante finansiamentu di estudio BES bo por haña riba [www.rijksdienstcn.com/studiefinanciering](http://www.rijksdienstcn.com/studiefinanciering).



## Informashon mas aleu

Riba e wèpsait di DUO tambe bo por haña un foyeto tokante finansiamentu di estudio, especialmente trahá pa studiante for di e parti Karibense di e Reino. E foyeto aki tambe ta disponibel na papiamentu i ingles.

Especialmente pa studiante i hende for di e region di Karibe ku mester paga bèk, DUO ta organisá diferente webinar (evento online). Bo por haña nan riba [duo.nl/antillen](http://duo.nl/antillen) bou di e titular 'Webinars en rekenhulpen' ('Webinar i medio di kalkulashon')

### Kita nòmber for di e administrashon di poblashon promé ku salida pa Hulanda

Promé ku bo sali pa Hulanda Oropeo, bo mester laga kita bo nòmber for di Registro Sivil, (atmistrashon PIVA) di e isla unda bo ta biba. Esaki bo ta hasi denter di dies dia promé ku bo salida, na departamentu di Asuntu Sivil. Ora bo establese bo mes na Hulanda Oropeo, despues bo ta inskribí bo mes einan. Pa mas informashon, wak:

<https://www.rvlg.nl/Informatieblad%20studenten%20Caribisch%20Nederland>







# Planifikashon

## Awor

- ◆ Buska informashon i partisipá den e **aktividatnan di eskoho di estudio (online)** di skol superior òf universidat, manera dlanan habrí, dlanan di orientashon, kursonan den zomer.  
Bo tin mester di un **DigiD**. Un petishon ta dura por lo ménos un siman. Pues hasié awor, pa bo no haña bo ku falta di tempu despues.

For di promé di òktober 2023

- ◆ **Registrá via Studielink.**

Pa mas tardá 15 di yanüari 2024

- ◆ Chèk e estudio pa **aplikashon ku numerus fixus**.

15 di yanüari - promé di mei 2024

- ◆ Último **fecha pa inskribí pa sobrá estudionan ku selekshon**. Pa mas sigur, wak riba wèpsait di e skol superior òf universidat pa e fecha mas tardá pa inskribí.

15 di aprel 2024

- ◆ Si bo a inskribí pa un estudio ku un kantidat di lugá limitá (numerus fixus), bo ta haña un **number di rango**. Ora bo haña un lugá, bo mester asept'é denter di 2 siman.

Pa mas tardá promé di mei 2024

- ◆ **Registrá pa tur sobrá estudio.**

Entre aplikashon i 31 di ougùstùs 2024

- ◆ E skol superior òf universidat ta ofresé bo un tèst di selekshon di estudio, pa wak si e estudio ta algu pa bo. Despues ainda bo por kambia di estudio. Bo a hasi un eskoho definitivo? E ora ei, inskribí pa e estudio. Bo mester tin e siguiente asuntunan na òrdu:
  - Bo a optené bo diploma.
  - Bo a duna bo datonan di pago den Studielink (lo informá bo tokante esaki).
  - Bo ta kumpli ku posibel otro obligashonnan ku e skol superior òf universidat a informá bo di dje.

Yüni 2024

- ◆ **Hasi petishon pa finansiamentu di estudio.**

Fin di yüli- komienso di ougùstùs

- ◆ Salida konhunto di e alumnonan ku ta bai Hulanda Oropeo bou di guia di TuranGoeloe pa un estudio na nivel di mbo, hbo òf wo.

Fin di ougùstùs 2024

- ◆ **Introdukshon serka e skol superior òf universidat**

Promé di sèptèmber 2024

- ◆ **Komienso di bo estudio nobo!**